

四庫全書

集部

欽定四庫全書

集部
石洞集卷十七

詳校官監察御史_臣陳化龍

侍讀_臣孫球覆勘

總校官編修_臣王燕緒

校對官編修_臣朱攸

謄錄監生_臣樹

欽定四庫全書

石洞集卷十七

明 葉春及 撰

詩上

五言古

送大司馬劉公晉御史大夫赴南都

且停武溪歌聽我九罇詩
武溪何滔滔信宿公將歸
公來觀衮衣寶劍光陸離
一舉衆郡平再舉龍川犂
選徒

獵苗翳狡兔獲無遺谿谷盡黍稷黍稷何祁祁以我章
甫冠易彼鱗介資白雉效越裳明珠耀璇題吉蠲假烈
祖祝史咸正辭太常書丕績濯濯蛟龍旂輔相肅崇班
專席雄百司我皇求明德簡在固所宜夢卜習休祥爰
立將在茲耀靈麗中天寧照一室微

其二

五嶺何崔巍三水流湯湯我公肅明詔脂車戒舟航樓
船邃以廣宛若飛龍翔鳴鉦擊鼉鼓嘈嘈水中央組練

麗且明旌旆儼成行舳艫亘千里豈曰江路長輕雲承
廬室清風翼帆檣瞻望邈難及改轍登高岡馬上笳吹
聲饒歌互相望橫海不足云伏波詎能方四牡向北馳
行行至故鄉置酒朱陵臺張樂洞庭傍日出照桑梓灼
灼有輝光為謝父與兄簡書不可忘

其三

金陵佳麗地翼翼帝皇都宮闕出浮雲陵寢翔金鳧貌
貅二十萬鉞戟鞭雕弧濟濟鷁鷺羣謁謁王侯居信哉

豐鎬傳宣彼河洛俱三條控九市夾巷羅長衢古來遊
俠窟白晝驚揚桴巍巍司憲臺栢樹棲羣鳥盛夏厲凝
寒嚴霜下庭除豪強莫恣肆府中有大夫藜藿誠足採
虎豹山之隅南以殿長江北以鞏皇圖帝載惟汝諧鍾
山且斯須

其四

孔父常栖栖老聃伏柱史緬惟兩聖人委蛇亦人世珪
組豈我榮冠纓豈我萍道以神理超物用玄羹美先民

有遺言大隱隱朝市軒轅遊空同至彼陰陽始不離黃
屋尊玄珠得赤水岫嶺有真宅高館疏峯起紫芝洵可
餐皇心隆所倚撫翼摩雲霄潛鱗媚清泚升沉各有分
吾方從綺里

送少參歸安韓公兵備廣右兼懷方伯喬公督
學劉公

昔余寄薄遊並公宰閩邑翩翩丹山禽千仞亦棲棘拙
劣守故丘公獨崇明德建節炎海隅晤言慰疇昔昨來

祇簡書忽有西甌役灘江豈不遙旬宣美臣職胡由事
攀留壺漿望如渴矯矯雲間公夢寐猶顏色劉君鄱陽
彥賤子實親識嶺樹搖心旌一別雲泥隔行矣各致辭
努力加餐食

葉順德報政

我本樗散人掛官羅浮居著書豈為愁屢空常荷鋤明
公來吳徼政美錦不如惠我數書札字字皆明珠結交
有神合一見言相於校讐非馬隊避人類逃虛本無白

雪音和者衆千餘絃歌日盈耳有酒時招呼君行報天子吾當歸樵漁

送周納言之金陵

矯矯銀臺司金陵氣蔥鬱策馬晨度關萬里懸燕北彤雲東北馳縹緲蓬萊色行者日以遙居者日相憶所志在策勲君行叩閭闔

其二

伊余倦塵網寂寞羅浮居古人日以遠攬衣起踟躕雪

浪天一方斯人去已徂歡愛若夢寐念此徒歎歎之子
挺南服行行嗣前車祇役炎海涯握手情相於分飛愴
鳴鴈惠我雲中書如何倏傷別把酒臨路衢王命有嚴
期邨能立斯須

壽謝惕齋先生六十

子綦隱郭南噓噓向天雲先生隱郭北兀兀窮朝暾南
北豈有擇今古焉足論先生孕元氣妙契無始門艮背
不見已勵志故絕人即今六旬周履此初度辰乾坤一

氣運旁薄大無垠大撓何劈劃坐使干支分一元十二
會運世如次鱗辟如一歲內無夏亦無春辟如一日內
無丑亦無寅始終而終始闔闢而渾淪此言如不信請
問庖犧君

送方伯滕公拜大中丞操江

紫陽鬱崔嵬闕里在南服武夷似岱宗沂泗流九曲五
百靈運周誰哉繼芳躅芳躅君繼之黃華翦鸞鷟伊余
昔遠遊四海莽一矚賣珠見楚商玫瑰美其櫝燕客恣

譚天齊人誇炙轂驅馬復來歸彈琴坐空谷一朝遇知音並奏絲與竹何以結同心願比雙黃鵠

其二

羅浮標粵徼南海浩無垠亭亭枕根樹三蒙君子恩昔抱宓生琴彈向海上村桑麻被廣野雌雄滿平原載登清憲臺高步紫微垣陽涯肅秋霜陰谷回春溫流聲馥蘭芷六月化神鯤飄飄扶搖風蕩蕩閭闔門但願居鼎衡畢力奉至尊王度日清夷賤子復何言

其三

岷江何迢迢萬里朝於海洪濤翻赤岸衡霍嶽將殆神
京奠金陵天塹茲攸在太祖昔平陳戈矛白皚皚樓船
喧噴薄組練揚光彩敵克笳吹還力屈鯨鯢醢四海今
一家蕭蕭空故壘昔人戒衣衲有備乃靡悔中丞嚴號
令到日旌旗改南顧憂可紓洪圖億萬載

輓鄭烈婦

金塘含綠水中有雙鴛鴦朝啜蘋藻葉夕宿蘭茝傍驚

飛乍挾起反顧復成行飄風西北來吹我東南鄉雄飛
墜毛羽身殞天一方雌鳴慕儔匹啁噍獨彷徨寧同比
翼死不忍兩分張閨中有淑媛姆教夙所將十七為君
婦衿纓上高堂十九君見違呼天絕其肮君若江上舟
妾似舟上檣但知隨所往玄臺共翱翔禽鳥有至性斯
人詎能忘我欲永言之祇恐聽者傷

題松栢芝蘭圖壽兵憲王公

亭亭天陵松撼撼大谷栢寒暑有推遷柯葉無改易下

有芝與蘭蔭此條千尺煌煌媚漢宮
馥馥芳楚澤三秀
玄潤流九畹香風溢天地良不疑物理
晚始獲芝蘭日以榮松栢日以碩歲晏
君乃知風林徒策策

登衡山至雪霽堂雨繼以大風

朝發望岳門午憩雪霽堂脫鞅蹙安豫
臨軒盼高岡巖
雲膚寸合凍雨散微涼飛簾東北來沙礫起飛揚萬竅
盡怒號五峯若趨蹌詰朝登祝融天路阻且長僕夫竊
偶語何如朱與張皇昊杳無心造化浩茫茫陰陽互遷

變儵忽自難量太和值霧雨曉日升扶桑今茲儻不然
孰敢問彼蒼達人貴大觀委運固其常

秋草鵲鵲詩送黃箴卿扶兄櫬歸閩

昔我宰錦田楚楚見二子鳳雛出丹穴藻翰亦相似天
路安足陵和鳴合宮徵南方有朱明積石亘千里璀璨
鳳凰居琅玕滿庭祀今春振羽翼翩翩遠戾止云何中
離乖斷絕春風裏一雛隕黃泥一雛痛徹髓喟彼鵲鵲
詩淚下如流水

其二

流水涵有時淚下如縷縻人生鮮長在歟若石火馳朝
遊竹素園日夕寄招提良朋豈不嘆友于心獨悲一號
再三踊欲去還復遲生者祇自苦亡沒寧詎知嚴霜瘁
野草孤鳥將何之

其三

孤鳥思故栖靈輿難久停星言夙行邁賓客皆涕零啓
殯鱣湖汭進棹龍川汀陰雲冒廣柳悲風結前旌山川

脩且阻日落不遑寧契濶亦匪他骨肉弟與兄昔者為
鴛鴦何意為鵲鷁感物三嘆息寤言自拊膺

其四

拊膺終夜起徒御皆晨餐秋風何蕭瑟百卉盡凋殘攬
涕策素輻輕旗自飛翻虎豹夾路啼哀猿叫空山我行
尚粵徼何時造閩關閩關歸有日逝者不復還仰視雲
間翔俯看清水瀾彼此各儔匹人生多苦顏孤影誰與
晤躑躅增長嘆

其五

長嘆徒自傷，倏忽至舊疆。
大海跨飛鯨，舉首見洛陽。
徘徊橋北岸，嘉樹鬱蒼蒼。
此樹令所植，三五各成行。
昔我初往時，兄弟倚樹傍。
今我遠來歸，舛獨徬徨。
誰言見城社，憂思若可忘。

其六

憂思不易裁，行行至里屋。
忉怛黃髮悲，慘淡白日速。
周親盡奔湊，友朋無綺服。
痛定前致辭，風霜易感觸。
未暇

死者傷且為遊子祝錦田我桐鄉鬚髮蓮花麓而兄老
休貞南北遙相矚有慟顏喪予相長吾望卜沈憂亦何
為明德貴自勗

與張道人

匡廬有道士來往無行迹清晨吸彩霞日暮煮白石從
余天一泉披榛弄涓滴作詩或譏余未悟畫前易吾師
漁溪翁無極而太極

贈別譚見日山人

與子產南海迢迢隔河津一朝遇五羊似我平生親袖
中握靈蛇各各稱人神風霜豈不苦憔悴寧惜身上帝
居紫宮狂噬何信信娥眉妒不收嫫姆充下陳黃金百
鎰盡志士常苦辛

其二

苦辛誰念之短褐信細微先民詢芻蕘此道久吾欺白
日豈不光仰視浮雲馳風霜日侵蝕衾被寒共持朝飲
同荆軻暮宿高漸離絃促和益寡無乃郢曲非忼怛亦

何為惻惻臨路岐

其三

路岐何遙遙一步一回顧脫鞅桑乾朝挂席河西暮風
雲一相失悽愴萬里去漳衛濁且深青齊廣以莽駕言
適魯邦再拜宣尼墓宋桓亦何為揮斤伐我樹引領梁
甫吟氣結不能訴

遠行有以金贖者賦謝

志士思怒死裸葬官道傍豈不惜憔悴為謀當自臧曰

余失前路適楚臨太行方愁道邈遠况復懷盈箱不見
五都豪白壁黃金堂一朝赴冥廓徒使雍門傷我欲竟
此曲此曲重且長君不諒鄙人申之以短章

飲陳巽卿宅即席賦得帝字

黃公避秦皇子陵傲漢帝萬乘彼不榮五斗吾何利邇
來脫桎梏麴藥聊避世田父尚不辭況子夙同志高堂
敞華筵賓客縱橫至日莫飲未休榕下還席地杯行不
停手醉卧何足計昔日習家池與爾垂千祀

初山人遊武夷追送李氏所即席賦贈

武夷多奇峯九溪曲相連窈窕信靈異虛無儼羣仙昔
我遠遊之枕席生雲烟朝飲幔亭峯夕泛駕壑船忽忽
六七載冠綬為糾纏脫屣苦不早白髮將垂肩君今躡
其巔使我雙淚泣碌碌復何為妻子豈難捐

其二

北風何其厲遊子不可羈言指武夷山歲暮以為期竭
來不入門去矣亦不辭平生抱奇氣頓首還自疑丘壑

與市朝彼此固有時君若過五曲中有雲谷祠願言蹇
芳杜為我三拜之泰山久已頽嗟予將安師

其三

張公湖海士載酒官道隅冠蓋何繽紛藹藹皆文儒客
行豈不遙脫鞅還踟躕開尊藉芳草門有雙墳俱借問
泉下人富貴今何如寄語幔亭君擾擾不可居

七言古

梅關憶羅浮書屋

去年經此長安路滿岸寒枝綴香絮今從此地故鄉歸
幾陣輕風帶微雨轉頭世事不堪論白猿洞口愁黃昏
儂家正在羅浮下欲去攜家卧白雲

大王莊行

舟泊大王莊夜飲天津酒大王泯滅不記名莊上空餘
數株柳楊柳青青婀娜垂櫻桃熟時人未歸當時獻納
麒麟殿今日淹留鸚鵡杯杯酒沉沉夜將夕江上茫茫
天一色但恐壺中綠蟻乾何處為家何處國

廬山謠答謝潘二子

昔年有仙人炯炯雙碧瞳手持珊瑚拂我頂謂余連有
神仙風謫向樊籠二十年清都紫府徒名傳無由乘玉
駟直至參寥天傳聞黃庭藏石室琅玕為緘金作鐫便
向青崖渡六龍管教白晝生雙翼青崖白石連丹丘雲
車羽轂驂蒼虬濯髮瀑布水身登香爐陬同行諸君多
意氣作詩往往來相酬康樂因為吳會吟安仁作賦如
陳琳開緘展轉再三讀重之不減雙南金鳴榔鼓柁殊

未已此身已在廬山裏行間倘遇浮丘公雲中遙謝二
夫子

和梁廣文苦雨見寄

高樓下枕鵲江曲雄視神州一百六二水晴分素練明
羣山曉望朱旂簇畫棟崔嵬百丈遙文牕繡戶接青霄
鳳鶯徑度諸侯宅雄堞斜通學士橋橋邊宅畔多車馬
趙瑟秦箏連日夜雖然北市連樓前更喜西湖注樓下
莊生被諍自雕陵三日樓居不出庭息陰解著絕交論

思過能忘閑閣情憶昔鵲鳴江日暮須臾覆手成風雨
鳴鳥朝啼水北雲飛簾夜捲河南樹世事因知頃刻間
轉海排山不作難遙想美人隔江浦望而不見空長嘆
忽傳琬琰來荆璞感子交情等山嶽待至天晴旭日升
為君重泛剡溪約

荆卿歌

黃金臺高秋草生白日茫茫空復情昭王古墓沒長道
漸離擊筑同荆卿一旦相逢感知已素車白馬為君死

易水歌聲不忍聞
十年遺恨燕太子

王憲副招飲梅菴

北風無雲凍欲裂
野人僵卧山中雪
使君清興似南樓
尺書招飲梅菴月
梅花香影落江濱
月華如畫酒初醺
夜闌坐覺禪心長
孤磬泠泠竹院聞

鄭太守謠

鄭太守民所依
去年憂水今憂饑
三年頗賴守端溪
民寒有絮饑有糜
坐令闔郡無瘡痍
一硯不持今古師
鄭

太守民所依願爾朝天及早歸

送洪將軍叅將思州

將軍勇畧貫今古稚子能文君好武幾年血戰靖妖氛
四海芳聲馳幕府嶺東昨破岑岡賊豺狼盡號鯨鯢泣
忽聞詔下調西州西人舉額東人愁霓旌月映三江夜
虎帳霜傳八桂秋君不見樓船昔渡蠻溪漲銅柱今懸
霄漢上斯人寂寞已千秋願君早繪麒麟象

送牛將軍之長樂

將軍寶劍明秋霜用之擊賊賊走藏紅光紫氣人莫御
匣中夜夜鳴風雨涼秋八月鴻鴈來滿城賓客皆奇才
祖行北上金山道西控循惠東潮梅日暮長風石馬嘶
雄心對此淚堪垂客中蟋蟀聊卒歲閣上麒麟繪有時
金山石馬
皆長樂山

用謝惕齋先生韻壽劉古唐翁六十有一

鹿算龜齡天賜福豹蔚鸞翔人所欲赤松不解草玄經
跨鶴纏腰鮮其躅紫陽磊落繼前庾五百年來公降生

鳳凰在郊龍在埜山阜岡陵岡不增麻姑王母皆誇誕
渤海漂桑海為岸一氣渾淪轉八紘何者支兮何者幹
億萬長留石室書漢廷無數馬相如中元甲子今初起
月到天心水到渠

五言律

初春滕方伯支學憲招飲藥洲藥洲南漢離宮
有池今名白蓮池畔有九曜石

南國傳經地東風應律天隨鶯過別院振鷺愧瓊筵酒

氣花間出歌聲竹外傳興酣還卜夜改席向湖烟

其二

晚入梅花渡春移菡萏舟星辰隨棹散河漢抱尊流說
法龍潛聽論詩蟻任浮濟川公等在吾道已滄洲

其三

留客平原酒賢哉二大夫致身霄漢近傾蓋古今無冀
北空良驥闕西得舊儒偶然山澤叟今夕一尊俱

其四

蒼池流碧玉傳是漢離宮霸氣千秋盡文韜五嶺通市
槐風轉綠壇杏雨沾紅卽事成今古青山滿越中

其五

何年榆歷歷隕石越江干河漢支機遠芙蓉倚劍寒堦
前藏洞壑日暮對琅玕願作周王鼓橋門擁漢官

趙太史黎秘書龐太守湛別駕周明府祁孝廉
過訪石洞

傲世吾何敢高情客故來鳥迎雲蓋入花近野筵開種

秣常供酒攀蘿並上臺惟應漁父笑桃向水邊栽

同趙太史憩玉女峯

蕭散金門客徘徊玉女峯風光祇自媚雲黛為誰容蔓
草羅裙妒寒花繡幕重他時遇簫史長此憶仙踪

同趙太史遊飛雲頂

飛雲天不遠乘興歲將除雨凍河山合風高草木疎路
從千嶂迴歸及五更初昏黑藤蘿外膏肓信不虛

青霞樓讌集

世遠仍樓在霜清與客凭
窓間羣岫列堦下一泉澄簪
笏名家舊壺觴野興增卜鄰
吾已後惆悵暮雲層

龐子講堂與趙太史諸公夜談

霸主離宮廢名賢講席開
山河移萬戶俎豆集羣材
坐久黃龍幻談高白馬來
藏書在何處知有子長才

五雲鳴珮卷為李雙江博士題

都講鱣重奏高臺駿始招
千金迎委佩雙闕倚層霄
露憶金莖近藜分太乙遙
爾家恩不薄努力聖明朝

王母壽詩

王母本仙姬龜臺爾所司
藁砧一以去菱鏡遂捐之歌
苦傳黃鵠名高動赤螭
庭前有叢桂歲歲發華滋

飲潘魏叔宅

狂歌君莫笑偃蹇世相輕
寂寞少年事淒涼今夜情深
杯甘百罰明月澹孤城無限傷心淚
東南只自傾

贈合浦耿將軍

金貂分泗國鐵騎出炎方
百戰關山苦頻移帶礪長海

雲高漢柱嶺樹接濠梁合浦重淵媚懸珠夜月光

其二

高皇思宿將諸子盡通侯萬里承家日孤臣報國秋雲
從江北望水向越南流世業看都護風塵一劍收

夜至碧山草堂得開字

秉燭到池臺清尊夜復開坐驚孟公至城抱碧山來密
樹搖燈影繁花艷酒杯主人投轄意吾已席莓苔

潘祁叔正叔沈汝清徐文仲攜酒過訪得林字

故人能載酒秋色滿楓林三徑因誰闢千杯為爾深城
烏啼夕照塞鴈度寒砧不憚歸途遠應憐命駕心

中丞滕公學憲郭公枉過草堂

蓬蒿欺仲蔚三徑共人長駟結風雲入旌懸日月光玄
經孰可覆白眼世相妨亦是同聲地無嫌漉酒嘗

壽潘初叔六十

吾生後甲子白髮獨饒君解帶千山雨談天一片雲鳳
毛三世業驥子五花文何以為君壽雙江對晚曛

送孫使君請告歸樵李

雙轡非不貴一病竟如何
白壁投人少青山入夢多
家臨滄海曲帆挂太湖波
日暮逢漁父君聽鼓枻歌

其二

即令耽卧病何事薄淮陽
伏枕春雲過開門碧草長
世情增骯髒吾道付滄浪
却限羅浮郡無由下鳳凰

其三

歌鳳狂猶在屠龍技未施
黑頭方宦達白眼使人疑
潮

落胥山廟雲深陸相祠平生懷古意獨立迴相思

其四

君豈陶元亮歸與塵八旬門前聞五馬濠上看遊鱗束
帛徵賢日拖金報主身古來有道者不必離風塵

其五

請告須莊助還家感漢皇暫宜草木疏未許芟荷裳北
海清輝在東山引望長憐予多病客無計起膏肓

中秋飲潘魏叔亭子翫月得光字

中秋忽已過明月復清光玉鏡圓將滿金尊倒欲狂東
江當戶盡北斗掛城長不厭連宵飲還來索酒嘗

除夕同郭建初登高士峯明日立春

作吏當周道登臨能幾何歲隨今日盡春向暮雲多海
色連睥睨山尊對薜蘿相逢如郭泰肯惜夜鳴珂

訪江惟誠華林寺並贈同學諸子

廢寺殘僧在寒燈繡佛親風塵驅短鬢意氣向何人白
石南山夜青尊北海春古來豪傑士偃蹇見經綸

其二

昔人多寂寞諸子合丘園
蒼蘂僧同舍藤蘿客到門
解衣山雨過移席野雲繁
為語張儀婦吾今舌尚存

其三

山林諧宿好君況是同心
倚劍崑崙近褰帷渤澥深
風巢孤鶴唳雲壑一龍吟
夜半商歌意伊誰解識音

其四

共是金閨彥同為寶地棲
龍池今日醉鴈塔異時題
坐

石蒼雲滿開尊碧草齊前村延暝色應唱白銅鞮

同山人林熙甫父老陳焜諸生陳巽卿陳練遊

菱溪五雲山

危石盤空上諸峯人望低山連三髻北雲起五靈西谷
靜泉逾響林深鳥亂啼採菱人不見芳草自萋萋

其二

鹿門吾欲卧龜組爾何牽名姓陶公後登臨謝客前
人隨白眼把酒問青天偃蹇風塵裏茲遊益可憐

其三

彭澤歸元亮眉山起長公誰知千載後今日一尊同夜
色清溪上嵐烟碧澗中他年傳盛事應識古人風

小岬石臺

倚劍孤城暮登臺萬壑秋潮平沙岸小月落島烟浮白
鹿通夷國黃雲滿戍樓南征斷消息橫吹不勝愁

訪詹咫亭先生巢雲書院兼呈社中諸友

巢雲高不極飛閣倚雲開樹杪滄溟盡尊前紫帽來江

湖雙涕淚天地此樓臺縱有終焉計能忘國士才

其二

峭壁倚崢嶸孤標接太清莫愁天柱折遙對雪山傾
曉散扶桑影寒飄落木聲伊人看獨似高士漫題名

其三

作吏如吾傲歸耕似爾稀不因滄海伴那啓白雲飛
倚杖閒花落開尊急雨飛尚書期可顧宿昔自依依

其四

惆悵出門去徘徊流水間菊花深復泛桂樹晚重攀返
照孤城斂寒雲大壑還明朝羈物役清夢到柴關

其五

江潭成獨往鄉里更多賢結社東林下論詩大厯前山
城飛白雪野寺發孤烟嗜酒客吾放何須復種蓮

同郭學憲歐水部胡計部朱明洞得山字

紫氣關中路丹丘海上山抗雲金作闕吸露玉為顏白
馬談猶在青牛去不還似聞笙縹緲跨鶴出人間

郭學憲歐水部胡計部過訪石洞得東字

抱犢鹿門中蕭蕭日暮風卧愁聞塞北立強離牆東濁
酒開三逕高軒過數公濟時吾豈敢愚谷倘相同

洪參戎和平大捷喜而有贈

喜看君授鉞一戰淨妖塵鼓吹軍聲壯旌旗殺氣橫今
皇本神武大將自經綸休侈封侯賞男兒合致身

其二

飛將分符出提戈奏凱回裹尸真國士推轂豈時才列

隊蛇矛動前驅鷺鼓催漢庭多寵渥陸賈是功魁

同晉江黃欽甫宿飛雲頂

天畔移孤枕峯頭卧五城銀河垂地落珠斗近林橫閩
越蒼烟合蓬萊碧草平未須愁罔兩中夜火輪生

李敬可劉和甫訪予石洞敬可贈詩有卜鄰之

意賦此奉畬

空山吾獨往二妙夏能來雲裏峰為障天邊石作臺澗
流風不斷杯酒雨相催結屋如鄰並青溪掃綠苔

飛雲頂

峰到飛雲絕
晴看赤日沉
露凝雙鬢白
龍起二儀深
積氣連吳楚
啼猿自古今
天門應不遠
乘興欲登臨

楊明府覲歸

聞道王喬舄
初從帝里歸
承恩天廣大
為政日光輝
粳稻收殘雨
牛羊下夕暉
預愁丹詔動
畎畝正依依

長洲

峭石水瀠洄
中流莽自開
山銜落日去
樹擁大江來
繫

纜圍青壁援琴坐綠苔客途消百慮曳尾信悠哉

三月三日同黎惟仁林開先譙梁少仲東庄

別業臨祇苑芳筵俯梵宮潮平樓接海雲起樹浮空花
落高僧雨風褰少女風春山正多伴歸路野烟中

白雲洞口號

洞晚雲隨入巖秋雨自飛莫愁霑野席猶得浣塵衣歲
月吾將老烟霞興不違昔年招隱處叢桂可同歸

其二

古洞何年闢長留宿白雲江山千里盡風雨半天聞芝
朮堪時往壺觴到夜分依依乘月去猿鶴惜離羣

病起見菊

名花非不好濁酒賞應難可惜籬邊色猶從病裏看枝
疎風自倚蕊冷月同寒莫遣芳菲盡相留伴鶻冠

入羅浮夜訪毛聯伯姻家

為就羅浮卜言尋木石鄰野昏惟信杖林動忽疑人尉
遇灞陵醉門呼垤澤頻曲肱如可托風露亦容身

贈毛聯伯

毛公元特達混迹且漁樵宅接羅浮近經傳漢代遙棣
華時並重桂樹昔同招何日青霄外從予度鐵橋

送楊明府入覲

一塵衣茂宰三接待康侯雲裏晴看鳥江邊晚上樓黃
金高漢詔白雪拂吳鉤欲問垂綸者滄浪自釣舟

題陳明府園亭

背郭名園好青山帶綠谿檻花經雨濕亭樹拂雲低扉

靜隨風掩林深自鳥啼寥寥蒼野裏何異鹿門栖

其二

朝市違簪紱林塘傍芰荷雲歸三逕遠幔捲四山多松
韻聞琴瑟花容艷綺羅更憐門巷遠車馬少經過

其三

素練明前浦蒼屏繞四圍一亭高突兀七月尚芳菲竹
覆山扉重花侵石路微自憐幽興洽壺矢夜忘歸

其四

芳園連梓里秀色總堪憐
簾上東巖日牕含妙峒烟
柴桑新植柳華嶽舊栽蓮
千載王摩詰空令畫輞川

句漏洞用壁間韻

巖洞開前代攀躋屬早秋
蒼龍如可馭黃鵠復何求
石室餘荒蘚金書沒古丘
因逢抱朴子雲雨亦來遊

其二

昔人乘鶴去遺洞已千秋
雲向蒼梧過仙從紫府求
風雷喧碧柳龍虎護丹丘
未遂幽棲志空令兩度遊

壽養晦林翁八十

嚴君金石契昭代水雲身種藥曾開洞栽桃不記春歌
傳黃鵠遠髮映白鷗新今日非熊夢應知把釣人

送陸川尉上計

最愛南昌尉能聽單父琴課農春作伴種樹日成陰萬
國燕雲曉千官漢殿深持將百里考庶慰九重心

晚泊彭城

晚泊彭城驛蒼茫對落暉春光途裏盡鄉國夢中歸事

業慚青鏡風塵換素衣惟應鱣湖上閒坐釣魚磯

阻風女兒港同順德何紫雲嚴從陽避暑大孤

神祠酌酒賦詩

繫纜依祠下開尊向水濱共憐今日醉猶是昔年身風
急豚翻浪檣危燕趁人烟波正如此莫負玉壺春

病夜

卧病畏離羣依依有數君牀窺簷際月壇響樹邊雲泉
石膏育久形骸世界分明朝欲登覽谷寺夜鐘聞

其二

盤谷人來少深秋瘴又多萬山環抱邑一水曲通河病
起先花發詩留後醉歌偉哉欲觀井天地看如何

題天池寺步顧東橋壁間韻

誰言鑿混沌我道本如來鐘裏千山出空中一竅開非
同負芥水可置坳堂杯欲共南溟鳥天池數往來

其二

水接滄溟遠峯連碧落高江山酬夙興天地惜秋毫如

淡偏宜瘦逃禪尚覺勞那堪人世上終日任風濤

均州公署獨酌

涼月將圓夜秋風欲發時一尊為客久雙鬢使人疑籬菊他鄉老村梅故國思那堪正蕭瑟烏鵲繞南枝

官舍

官舍千山裏朋遊四月中出門蘿石近旭日柳烟空蒲葍沿溪轉桑麻逐徑通不須解簪組吾已鹿門公

其二

却怪今朝雨翻憐十日晴
閩山遲去馬嶺樹候歸旌
愁失張平子狂多阮步兵
所忻謝軒冕雲嶠得橫行

開池

買地成愚谷開池似習家
移居後春色猶得及桃花
水引嬋娟入風連蛺蝶斜
不須到山簡獨坐待歸鴉

送王羅江掌教昌化

適越君何遠梅溪憶往時
蘭舟宵共泛蘿石月同移
相去踰千里卑栖各一枝
採蘋因有贈為寄子陵祠

其二

伐樹何騷屑披榛共苦辛
衣冠秦殿在絲竹魯堂新
最愛吳山好無忘處士貧
他年解簪組相訪粵江濱

洛陽道中

閉關逢令節行役度良宵
種秫難療病為官易折腰
嶺低西鵲月橋落萬安潮
寄語淮南桂深山欲共招

藩伯徐公子與餞別省中賦得軒字同席顧季

狂郭建初

賢達終麟閣迂疎只鹿門世應疑傲吏名豈避乘軒
明月南樓興青天北海樽更逢多麗藻聊得賁丘園

題白鶴峯壁

紫府曾通籍青山每振衣
朅來騎白鶴清影照江湄
說法龍潛聽開門鳥獨飛
正憐峰頂樹今日更歲蕤

遊黃塘山庄

溽暑辭朝市言從此地遊
樹深芳徑小花密石堂幽
野蕨同僧飯陰崖得句留
分明絕塵想身外更何求

其二

何處尋芳逕西湖一草堂山從門外合花近席前香水
榭宜風舞烟蘿愛日長況逢支遁在林下足徜徉

送南園鄭文學遷榮府教授

吾憐鄭夫子白首向王門桃李庭前樹桑麻海上村宦
情江漢遠驛路雪霜繁預想枚乘去多從賞兔園

五言排律

上大司馬劉公二十八韻

聖主今宵旰明公屬棟樑黃金燕駿貴皓首渭鷹揚氣
孕衡山秀名兼楚畹芳文章驅屈宋夢寐見虞唐白簡
傳三殿彤弓出上方瘡痍蘇諫草蔽芾頌甘棠牛女連
閩海江湖帶豫章伏波元矍鑠安石豈清狂百粵連天
險諸蠻莫陸梁皇威宣節鉞父老走壺漿兵洗羊城雨
氛消象郡霜奇勲班定遠殊錫漢明光才本兼文武銘
終耀鼎常腐儒憐偃蹇作吏藉包荒社樹徒樗散冥鴻
耻稻粱賦常思粟里澤敢擬桐鄉幸不江魚葬寧論市

虎傷虛名慙薦剡初服戀荷裳官拙妻孥嘆囊空僕從
亡為農依石洞晞髮向扶桑愚比生駒谷人嗤處燕堂
自來甘尚白誰復顧飛黃幕府籌多暇瑤槭喜不忘登
樓瞻庾亮伏櫪遇孫陽望繫三朝重光懸紫極旁風雲
趨鳳闕劍珮入鴛行南紀恩波濶中興德業昌濟時公
等在吹笛任滄浪

奉送御史大夫少司馬吳公晉大司空還陪京

三十韻

天地昌堯歷朝廷重禹謨星光迴八座氣色動三吳遇
合明良早賢稱父子俱名高烏石雋宦達白門趨化育
覃甌駱旬宣浹汴都後先元濟美敷歷盡亨衢開府湘
山近揚旌楚水孤奇勲標八桂重鎮扼蒼梧烽火欣全
熄壺漿望已蘇武功銅柱勒文德鐵橋敷油幕歌旋凱
楓宸喜獻俘兩朝心並赤三世錫偏殊謝砌蘭為玉王
庭樹是珠承家恩浩蕩報國力馳驅運屬夔龍會誰其
稷契徒九重來紫詔三輔叶黃闕官應天喉舌才充國

瑾瑜上公新劍履高帝盛規模旆引鍾陵月帆飛粵海
鳧笑余三作吏垂老一潛夫自解閑疆綬長甘谷口愚
豈知青眼顧能及涸鱗枯禮數光蓬華形骸畧散樗副
書慙石室浪迹托江湖生事惟餐菊浮名任守株雲泥
俄隔絕岐路獨踟躕禮樂酬明主文章起大儒調和憑
鼎鼎盤錯別昆吾公且圖麟閣吾將老釣艫故山芳遠
志不必問長途

鄭端州邀星巖登高因之泛湖陳潯州在焉賦

得仙字

作賦三秋客登高九日筵寒螿啼草露雲鴈下江烟洞
窈層城外山浮積水前金箱圖五嶽芝闕儼羣仙太守
庭多暇邀賓席屢遷朝登松閣靜夕返桂舟牽簫鼓中
流震樓臺落影懸殊方黃菊節萬頃白鷗天棋拙逢勅
敵杯深怯老年鶻冠吾自放鵬路爾俱騫良吏雙聯璧
酣歌獨扣舷醉非風側帽歸愛月隨鞭何必東籬酌王
弘有酒錢

蔣公子訪予石洞賦贈

公子翩翩者雲霄鳳一毛西園讌方罷東郡興逾豪汗
血駒千里鳴陰鶴九皋嚴君循吏傳別駕呂虔刀學禮
趨庭暇尋山策杖勞捫蘿天路近度澗谷風號金籙羣
仙祕神房萬木交相求來石洞列籍俯春茅豹隱嗟吾
老鵬搏見爾曹他年倘相憶南望嶺雲高

李侯甘棠遺愛卷

代作

李膺仙舸發西泛錦江烟五載鳴琴日三春卧轍年桃

花霞片片棠樹月娟娟入蜀惟孤鶴攀劉祇一錢棘深
鸞鳳地草綠犬羊天白帝江聲合烏蠻棧道連文翁翻
教授夫子與周旋雲路看騏驎山城聽杜鵑魴魚慙國
士螢火只殘編誰念龍門客臨歧意惘然

奉送吳郡黃公參政雲南二十韻

文學三吳彥都俞四岳臣得師聯偃室謁帝契虞隣起
草揮彤管含香入紫宸漢宮懸日月燕谷變陽春樹引
雙轡出符分百粵新羅浮齋舍裏滄海驛樓濱虎渡洪

河歲珠還合浦辰
牂江來萬里
憲府據要津
使節東西
重仁恩
雨露勻
氛銷銅柱
肅詔下
玉階頻
豈為昆明戰
翻勤社稷身
碧鷄聊按轡
丹鳳待持鈞
澤憶莘畊老
霖思版築人
九重資密勿
四海盡調均
交合夔龍會
才疏鹿豕親
孫陽憐騶裏
魯史感麒麟
高誼魚投水
情深蟻泛醇
鶴峰間白晝
鵬路羨青旻
去去雲泥隔
栖栖洞壑貧
如蒙幽側問
莫道有垂綸

奉送林使君捧日瞻雲詩

謁帝趨雙闕寧親入七閩鶯歌聞上苑龍劍躍延津日
月開黃道乾坤繞紫宸漢金增秩貴晉馬錫侯頻辭陛
龍顏喜登堂鶴髮新璽書輝兩序壽筭獻千春客聚三
山彥家如萬石淳雲霓看五嶺雨露切青旻驛路花爭
錦溪橋草繡茵東征應作賦闕吏候蒲輪

登太 and 山南嵒霧雨連日披而出遊賦十四韻
北極森羣帝南嵒擅一宮路從鵬翼過門撼鶴巢通金
闕斜臨壑瑤臺迴架空摩天依翠壁拔地逼蒼穹馳道

緣崖轉雕欄跨磴雄披圖留漢時鞭石笑秦功玄圃崑
崙外神仙渤海東無心來楚望有意訪崆峒霧隱千宮
紫嵐遮萬樹紅拱雲連藻井簷雨濕簾櫳柳絮平鋪雪
楊花不受風槎疑銀海上人似玉壺中彷彿清都近飄
飄倒影窮始知遊混沌何必問鴻濛

石洞集卷十七

欽定四庫全書

石洞集卷十八

明 葉春及 撰

詩下

七言律

闕

闕

答陳別駕

勞人州郡心應苦
賴有雲巖北倚城
石削芙蓉牕裏見
劍橫星斗水中明
行常五岳藏雲笈
家住三山想玉京

願以佩刀酬聖主莫將蘿薜勝簪纓

答從仁齋

刺桐春滿百蠻天開府雍容訪道年
入幕偶逢滄海客傳書還得紫苔篇
疎簾奕對嵩臺雨照乘珠投石洞烟
千丈天河挂綠水九華秋下豫章船

浮丘為趙澈陽太史賦

霓裳日侍黃金殿炎服誰開白玉京
萬里風雲雙鳳闕三山宮觀五羊城
天空環珮朝聞鶴月到松篁夜聽笙

清淺蓬萊真瞬息請看東畔海潮生

五羊舟中與譚永明感舊

同舟潦倒說燕京墮淚東南去國情
易水悲風疑短劍薊門寒雪負長纓
十年叢桂劉安賦一片飛花陸賈城
老驥未須憐伏櫪江湖容易白鷗盟

奉送遡川楊公按察滇南

當年繡斧粵東來海色三山瘴癘開
玉筍雲霓天下望羅浮旌節嶺南回
碧鷄自著王褒頌駿馬高懸郭隗臺

況是昆明休戰鬪漢廷終仗濟川才

題徐孟晦綠陰草堂

高臺野色倚招提有客乘春一杖藜
湖瀉琉璃平楚外山開錦繡曲欄西
培風南海鯢鵬起落日東林虎豹啼
賦就自堪逢漢主他年回首白雲棲

端陽前二日宗陽約遊西湖同遊葉韡夫嚴體
恕姚抗之姪孫世俊得堪字

畫舫年年泛蔚藍三閭空自放江潭
聲聞鼓角千家盡

影落樓臺一鏡涵
漁父醉歌還鼓枻
故人衰暮喜投簪
且將醕醕酬時序
中散從來七不堪

姪孫世俊置酒第一樓同席潘李諸子得樓字

城上巍巍第一樓
樓前山水勝南州
隔牕千嶺當樽盡
捲幔雙江入檻流
燈火少年空白首

余少年讀書于此

酒杯長

夏有清秋高陽家
讌交親並一醉
暝烟散百憂

姪孫世儀將母永平省覲

白草黃雲出塞難
而翁今戴鷄鵲冠
趨庭月照關山迴

將母風連驛路寒北望桔槔低朔漠西懸鵲見長安
鬬鷄且莫隨諸少東郡詩成好寄看

送姻家韓伯聲之任桐栢

朔風楚水度征鞍詩傳于今又姓韓月裏梅花千里夢
雪中桐栢一壇寒談經鱸自清淮出高卧龍曾此地蟠
聖主好文過漢帝賦成早晚入長安

奉陪中丞滕公學憲郭公登白鶴峰同賦

昔賢遺宅懸千載此日高旌到二公人去碧山空有鶴

興來彩筆總如虹
晚寧蘋藻春雲裏
醉倚蒹葭暮雨中
今古重傷回首地
幾誰飛閣坐層空

暮春端州鄭使君招飲七星巖

芳甸春遊散紫烟
使君五馬鐵連錢
石含樓閣諸天近
水匝蓬萊列宿懸
陰洞雨來龍自語
寒城鐙亂騎初旋
故山猿鶴應愁思
滿地江湖且歲年

初夏鄭使君招飲七星巖

端州城北有嵒臺
臺下千秋石室開
倚檻牂牁來萬里

攀蘿星斗近三台蛟龍夏壑羣穿窟鸚鵡風林數舉杯
受簡焉能今白首賦成人羨大夫才

李廣文署夜談

十年苜蓿吾憐汝客舍端州喜屢過白雪江湖知己少
青氈天地悞人多春回門下看桃李日暮尊前對薜蘿
痛飲忘形誰得似鬼神何處且高歌

丁亥生日

少年結客五陵遊老去虛疑是故侯鏡裏春隨蒲柳變

尊前寒伴菊松秋
四方白髮羞孤夫
三徑青山有菟裘
稱意不能過半百
祇應吾道付滄洲

宦蹟流芳卷為鄭端州乃祖題

聞道南州作尉時
青袍白馬更多髭
三年始信輿人誦
百里空留漢吏祠
漠漠水田春日晚
飛飛野雉夕陽遲
只今惟有西湖月
長照汪汪萬頃陂

匹馬翩翩白面郎
彈冠曾入趙佗鄉
恩深展驥官非薄
最奏棲鸞髣髴蒼
一代芳名存汗竹
千年遺愛在耕桑

萊公祠下西湖水長拂春風百里棠

椿萱三壽卷為端州鄭太守題

曾向炎蒸載石還即看飛鶴下蘭巖
朱輪接武同西漢白首移文異北山
玉樹遠輝庭下彩瑤花長映鏡中顏
只今南國思公子遙望羣仙霄漢間

同鄭使君遊七星巖

青山如戟倚雲霄仙去巖空鶴可招
蜃市氣澄金闕出龍宮雲閤玉書遙
風生桂楫時呼酒月冷松門夜聽簫

濟世正憐公等在且謀生計向漁樵

同王兵憲登崇熹塔

九級凌空酒並呼憑欄回首見仙都
珠光夜半金輝映金碧雲中乍有無
江注銅標蟠地遠山連珠海入天孤
滄桑忽漫悲塵劫擬向支機問白榆

華墩清隱卷為羅氏題

愛爾茅堂背郭開古墩芳樹逐行來
牕舍白雪詩千首門遶清溪酒一杯
歲暮五峰供伏枕天長孤劍伴登臺

夢餘康樂今何在草滿池塘首重回

二瑞詩和劉開府

越裳東築受降城回首長鯨蹴浪行非霧遠含松樹曉
斷虹先報峽山晴風雷一駕鼉鼉窟日月雙懸驃騎營
聞道光華歌聖世將因並入管絃聲

右端州慶雲

虎牙高建趙佗城閃日旌旗拂鴈行蜃湧樓臺雲欲起
鳥知鼓角雨先晴劇乾並逐花間閣聞喜羣飛海上營

春色上林好相待
簫韶同和鳳凰聲

右穗城靈鵲

送蔡禎啓歸端州

千盤風雨落高秋
有客能逢桂樹留
碑鐫夏王生綠字
書傳周史擁青牛
洞中列籍澠為酒
海上名山石作樓
明到星巖楓葉下
扶桑東望是丹丘

送柯廣文先生赴建陽

傳經雪色滿羅浮
桃李陰陰出郡樓
銜鱸晚占卿士服

啼鶯春伴孝廉舟家臨龍穴三山近水到虹橋九曲流
千載方塘雲裊裊為將蘋藻寄滄洲

題沈參戎風木圖

萬家蔥鬱太湖濱佳氣吳閭足練新過眼千鍾懸鵲雀
傷心高閣畫麒麟天空落木蕭蕭下歲暮長空淅淅頻
有客覽圖愁獨立因君回首淚沾巾

百歲光陰隙裏過悠悠天地竟如何驚看逝水奔流易
忍見飛雲出岫多漫說千鍾酬罔極誰憐三釜嘆蹉跎

懸知大孝終身慕愁絕為君賦蓼莪

甘棠遺愛卷為李明府題

鳬鳥飄飄向碧空
楚天西望楚王宮
峰高白鶴千家雨
峽靜黃牛一笛風
到日瀘川迎五馬
他年碣石看孤鴻
羅浮萬樹梅堪折
曾有棠陰滿越中

和沈參戎曉發望平海韻

候吏鷄鳴報曉程
角聲初散遠烟橫
追風萬馬聯鑣度
照日雙龍出匣明
大海陰雲低幕府
亂山孤戍入前旌

將軍按塞還能賦願以饒歌答太平

逸史流芳卷為保昌吳令乃翁賦

忽漫青牛紫氣來關門令尹自仙才
天空漢闕雙鳬下日落湘山一鴈哀
白雪調高空黯淡朱陵洞杳沒蒿萊
少微寂寞休回首列宿光今接上台

九日高士峯讌集

傲吏名山不厭遊
況逢佳節更悲秋
浮雲曉向千峯散
落木寒臨萬壑流
海上樓臺澄蜃氣
樽前鴻鴈起邊愁

腐儒歲晚真何補欲向滄浪買釣舟

作賦兼隨漢大夫更憐葉縣有飛鳧深秋我飽青精飯
避世誰藏白玉壺老去風塵雙鬢改晚來砧杵一城孤
莫辭此日樽頻倒愁見當年角夜呼

同和山人登高士峰

城畔羣山亦不遙縣齋終日對岩窵登臨白幘還高士
海國青天自暮潮南浦佩環心欲折北風樽酒鬢隨飄
朱明石室同遊地松桂因君問寂寥

豐谷道中洪子順邀飲分韻得涯字

洛陽谷口自逶迤雲木蒼蒼滿古祠宅近青山微有路
潮來滄海浩無涯窮愁短鬢先秋色落日青樽對晚颺
澤畔相逢容易醉肯教漁父向人疑

金陵懷李宗陽赴襲

金臺迢遞塞鴻邊君去繁霜正黯然憶我定攜燕市酒
與誰同醉薊門烟鐵衣天上承恩早玉殿雲中入夢偏
明到都城興非淺開襟應待小春天

寄劉玉汝

嚴君交誼薄雷陳兩世金蘭分最親
袒褐幸逢明主聖
綈袍遙憶故人貧
鄉園鼙鼓秋來急
村郭蓬蒿雨後新
生計蕭條非獨爾
題絨南北共傷神

送姪男兆備兵寧紹

滇池節鉞回三殿
橫海樓船壯四明
虎旅舊傳君子陣
鯨波今為聖人平
天清蜃氣通蓬島
霞起鸞標見赤城
自合尋仙求大藥
東夷無用請長纓

建旄分府領諸侯萬壑千巖亦勝遊
山削芙蓉常帶雨寺藏松桂不知秋
青春草滿嚴陵瀨白露潮生范蠡舟
若到東山一回首須知小謝最風流

元旦

去歲今晨皇極殿龍飛寶幄靜朝鞭
垂紳曳佩此何處伐鼓椎鐘異往年
草色漸輝閩海日柳條遙弄薊門烟
傳經抗疏非吾事漫說仙郎白玉篇

穀日登盤谷巖樓諸生同遊言巖西南有芹山

觀舊址乃白玉蟾脩煉之所遂往尋之席地

復酌

高樓穀日歡同賞弄柳攀梅又此時開歲斜川誰共往
暮春沂水爾何遲年豐綠蟻隣能續谷煖黃鶯樹屢移
滿眼物華喧勃勃即看巖壑迴多姿

劇遊芹觀貪尋歷度嶺穿林坐翠濤山裏杯盤吾自放
鏡中冰雪鬢何逃路難時欲辭朱紱洞窈春應長碧桃
惆悵暮雲堪酌酹古原斜日滿蓬蒿

舟中抱病遣懷

抱病東還望不孤
羅浮回首見清都
膏肓自信為泉石
雨雪誰堪載道途
伏枕夏雲生几席
觀濤秋色滿江湖
丹砂未就頭先白
葉縣何因舄化鳧

葉韓夫李宗陽攜酒見訪

城上陰雲靜不開
為誰攜酒到蒿萊
醉騎白鶴昏鐘迴
書付青鸞暮雨來
垂老幾人還躍馬
狂歌孤劍更登臺
亦知逃暑同河朔
倘許明朝盡我杯

霧雨至太和宮俯視一氣咫尺不辨

五日陰雲鬱不開千崖蕭瑟氣悲哉祇憑客子青藜杖
拄到仙人白玉臺萬里風搏天柱動百靈濤湧雪山來
俱言石洞堪龍卧不遣荆南駕鶴迴

靉靆浮雲滿九關帝宮只在紫微間雨沾萬國看龍變
霧匝千巖隱豹斑駿骨已知輕郭隗蛾眉何復妬麋山
具茨咫尺襄城道牧馬寧虛七聖還

質明謁帝期雨亦往忽然晴朗遂得遍遊

天門初日照扶桑霧捲千峯見八荒遂使衝星朝玉帝
始知遇雨異秦皇山連瀛海三神出水劃中原萬里長
霽雪開雲俱往事丹梯南望迴蒼蒼

登太和山

縹緲靈光信有無秋高天柱倚踟躕雲扶漢時藏仙籙
天福燕京護帝符宣室席前憐賈誼茂陵書就媿相如
悲風落日增蕭瑟極目中原一鴈孤

玉梯矗立碧天愁金殿高懸萬壑秋坐擁龜蛇神北極

地分龍虎壯南州，衡廬半逐炎荒落。
江漢雙環太嶽流，更有蓬萊雲五色。
照暄長傍帝鄉浮。

過虎巖訪不二上人

一龕高傍虎巖棲，為訪東林到虎溪。
轉後三車空貝葉，悟來雙樹失菩提。
雲間玉麈秋相對，鐙映金輪夜不迷。
天籟聲中聞軟語，依依涼月曲欄西。

林均州招飲滄浪亭席上口占同席王楊兩孝
廉余門人東官黃子廣

路迷江漢百愁生，亭入滄浪一棹輕。
鼓柁偶聞漁父唱，濯纓寧比使君清。
層崖雨過芙蓉濕，曲岸烟開翡翠明。
塵滿素衣歸未得，石泉空負故山盟。

余石洞有洗耳泉

送廖大夫解綬歸閩

石洞歸耕卧白雲，幔亭招隱又逢君。
舉杯閩越飛鴻遠，把袂江樓比翼分。
塵世幾回傷按劍，北山無復更移文。
他年相訪漁樵地，九曲溪邊對夕曛。

寄吳一庵別駕

我從西粵罷彈琴君賦東征返故林轉眼江湖雙白鬢
側身天地幾同心逃歸實就羅浮卜悵望時為梁甫吟
莫怪虞卿輕去國著書元不為愁深

元旦同梁懋孳葉思叔冒雨遊湖是夜風雨大
作隨波達旦

元日今年雨不絕玉壺畫舫興何豪城邊暝合青山失
夜半風鳴白浪高咫尺樓臺藏洞壑參差鐘磬出林皋
明朝只在沙鷗畔凍草寒雲共羽毛

赴西粵投檄初在德崔子玉送至石門

為漁湖海昔同盟回首風塵此濯纓十日平原生夜色
一帆春雨見交情蒼梧愁聽湘妃曲五柳空高處士名
聞說淮南堪卧理梁鴻早已去西京

訪曾明吾

為誰挂席趨炎海忽爾穿松到夜闌滿眼交遊吾白髮
側身天地此青山蛟龍濤浪秋仍壯烏雀園林晚獨還
偃蹇尚憐叢桂內他年寒色共君攀

題白鶴山房

主人茅堂秋瑟瑟留賓栢塢酒常開山空白鶴何年去
日暮流螢隔幔來池草世傳鸚鵡賦海門東瞰鳳凰臺
黃金白髮俱塵土鷗鳥從君幸不猜

遊海隅山

海上雙峰鏡裏開芝城宮闕亦蓬萊九江秀色東南盡
三峽濤聲天地來薄暮魚龍喧鼓角中流日月隱樓臺
滄洲吾道真堪付漁子帆檣共往迴

贈鄭叔異

谷口風流有子真，故園松竹晚逾親。
綈袍曉帶烟霞色，蓬徑秋蕪芋栗貧。
下榻郡齋清漏永，傳經幕府絳紗新。
翟公門巷羅堪設，載酒時能訪野人。

送祁馬石赴京

燕臺俠客日相將，走馬曾遊易水傍。
明月逢人常按劍，白雲何處不飛觴。
行邊駿骨黃金重，到日鶯花紫陌長。
卜築茅溪憐愛弟，為誰春草賦池塘。

送葉韓夫赴京

燕京宮闕倚雲開
君去重登郭隗臺
千里驂騑元道路
五湖鷗鷺自徘徊
天涯公子思芳草
海上懷人寄折梅
卜築正憐羊仲在
幾時松菊賦歸來

酬梁少仲見寄

不見經年梁少仲
東園禊飲使人思
風迴寶剎潮生處
雨過銀塘客醉時
病起忽來青鳥使
緘開重見白雲詞
清秋擬鼓扶胥柁
為爾同攀桂樹枝

寄歐禎伯

故人薄宦滯燕京尚憶江都悵別情
三徙不離秦博士六經空對魯諸生
西山晚映青檀色北闕誰同白雪聲
朝罷九衢寒漏永可能清夢到朱明

銅嶺弔古

熊飛故居

千峰天畔簇旌旗想像勤王轉戰時
故宅有基巢水鶴空山無廟薦江蘼
悲風松柏人何在落日壺觴我不辭
滿地屬鏤無處死扁舟生計學鷗夷

留別陳輔德李敬可

澤畔行吟晚有君，天涯不復嘆離羣。
高齋實下陳蕃榻，對酒重論李白文。
醉後旗峯當面出，別時銅嶺一溪分。
亦知會合離非久，佇望那堪日暮雲。

歸羅浮

軒車十載走風塵，靈境歸來學隱淪。
猿鶴隔林如識主，峰巒當戶似窺人。
紫蘿尚拂遊時路，白髮慚非洞裏身。
結屋已連南澗曲，移文休擬北山神。

七夕

屢將時節客中過
今夜雙星又渡河
天上佳期應有數
人間歡會苦無多
合離不定橋邊影
巧拙何心杼裏梭
我亦年來解玄理
却憐塵世尚蹉跎

重陽後一日梁懋孚約遊北山

侵晨共到寒山裏
薄暮扁舟入晚陰
黃菊獨憐今日醉
白衣偏稱故人心
經年始得歸蓬舍
野性從來在竹林
不是重陽能補會
那逢樽酒滌煩襟

閒居

逐逐炊烟故不除
雁雁鷄犬伴閒居
鼠肝蟲臂勞天地
鳳橋龍盤接里閭
作粥每尋長白寺
閉門空著太玄書
傍人莫笑揚雄宅
紫府清都是我廬

窮巷回車本自偏
田家猶喜石堂眠
立錫近市非無地
抱甕林山尚有園
棲共鷁鷁資一樹
亂聞豺虎遍中原
傷心此日緣何事
愁聽孤城角夜喧

金陵寄內

畏途牢落已忘機舊學荒涼嘆昨非
覽勝欲尋白鹿洞題絨寄與樂羊妻
田耕瀝脚天常旱粟盡瓶中我未疲
正賴宿瘤將歷齒莫教歲暮泣牛衣

金陵悵望纔烹鯉玉帳遙聞已夢蛇
翟令無錢猶養女劉公有約好為家
乾坤委蛇人何與緩急由天我未嗟
不學向平畢婚嫁浪遊聊御白羊車

賞姪文兆菊

儂家小阮碧欄杆移菊梁園傲歲寒
已有郢人白雪曲

那愁陶氏黃金盤疎枝曳曳凍漸解密蕊滴滴露欲團
我會呼兒醉堦下何須載酒東籬看

和劉古唐翁論學詩

春陵一竅在圖先挈領提綱曠世賢悟後洛陽歸自別
熟時關內夜應眠
憐蛇憐虻情俱失
逃俗逃禪見各邊
動靜無端惟此理是誰參透大因緣

未發之中不是先一齊穿紐幾前賢回三未解揮戈舞
吹萬何妨隱几眠
朱陸異同俱有說
周程風月迴無邊

明珠欲得惟滄海却恐求魚向木緣

夢中作

第一樓中靜晚濤忽聞仙樂下雲旂青蛇舞共南天遠
黃鵠飛連北極高萬里長江堪屬目百年佳興獨揮毫
元精飽食朝霞氣老婦無勞喚濁醪

不寐

露下天空秋可憐高樓明月倍娟娟一株桂影江湖上
半夜鐘聲霄漢邊玉壺擊碎笑今日金闕攀援思往年

慷慨勞歌不成寐揮衣起舞雙龍泉

奉送按察馬公治兵河東

太行北望鬱嵯峨建節人傳馬伏波憲府山川雄魏國
油幢霜雪下汾河漢庭久擬三旌待晉史徒誇五利和
玃狁只今須薄伐期君出塞擁雕戈

除夕前二日武昌孫大守李別駕韓司刑置酒

黃鶴樓席上口占

欲乘黃鶴鶴不來黃鶴仙人安在哉雪飛樓閣客腸斷

卷十八
歲莫江湖老鬢催蝸角誤我葛洪洞駁骨欺人郭隗臺
澤上那能歌獨醒為君一飲三百杯

挽東泉李將軍

漏盡鐘鳴罷曉籌飛將軍不待封侯樓船泛海五千里
斧鉞成家六十秋玉樹西風愁裏折寶刀南斗匣中收
傷心兩世交遊淚嗚咽真同隴水流

直沽

復泉衛水還歸海吞吐漕渠是直沽秦漢黃河非禹迹

幽燕紫氣本皇都舳舻歲轉吳江遠日月天迴碣石孤
莫問淒涼元季事古今形勝仗訐謨

憶初仲繩

河上遊絲晴裊裊憶君尊酒惜年華西樵松桂還秋色
北闕風塵自暮笳落日帆檣惟縱飲避人江海且為家
憂時寄遠俱無賴腸斷朱明一片霞

懷梁僉憲

畫戟青驄府尊致身霄漢自高竊途泥愧我惟孤劍

歲月真誰可並論天地只今長閑寂酒樽何日共黃昏
東南鴻鴈來應少目斷羅浮海上村

鱷湖道中

鱷湖燈火杉篁夜足馬寒嘶萬木中明月正懸淮上鏡
怒濤先到澗邊松干戈滿地風傳角堞壘連天野燒空
奔走不堪鴻鴈裏豈緣行役限西東

登飛來寺

峽束滇江靜不流深藏紺殿對江幽玉環洞杳風生樹

金鎖潭空月滿舟
帝子南來山竹裂
仙人東去穀亭留
少年彩筆頻經此
捧檄重遊笑白頭

臨湘驛憶曾明吾

草際微涼過雨初
懷人山月到庭除
雲長漢北隨鴻鴈
水滿湖南斷鯉魚
芳樹晚留逋客駕
皇華秋憶使臣車
菟裘雙別吾將老
前席須君待禁廬

元日學憲李萬卿同男兆姪見過

歲歲柴門長綠茵
少城元日到何人
忽傳車馬填三徑

旋拂杯盤薦五辛
淝水阿玄新錫命
玉堂太白舊詞臣
故人一去雲霄迴
惟有春風伴葛巾

贈陳養齋

梅生去國愁吳市
三徑君恩此亦饒
白髮有時麋共往
青天無伴鶴堪招
惟將涕淚酬先帝
實見弓旌下聖朝
藜藿豈遺堯舜世
江湖容爾許由瓢

酬周玉虹見示閱師之作

見說周郎昨閱師
蛇矛壘壘羽林兒
承家斧鉞今投筆

橫梁江天自賦詩
關塞幾年啼虎豹
乾坤何處不旌旗
衝星匣劍啾啾動
悵望雲峯暮有思

贈別周玉虹

獨客深杯始為君
夏堂風砌夜論文
山園官舍雲時入
水滿江樓袂忍分
舊賞雨花愁樹樹
並飛沙鳥故羣羣
共來閩海頻傷別
細作音書寄鯉聞

送周玉虹至江口口號

欲別未別梅溪東
千山萬山相映紅
狎人鷗鳥漫多思

背日旌旗來晚風世路杯酒共為客海國音書愁遠鴻
南天聚散只雲水莫惜醉繁蕙葭中

期訪陳養齋因事不果詩以謝過兼為後期

避暑期君水竹居濠梁雲靜看鯨魚溪行棹擬衝鷗入
野酌瓜憐帶雨鋤無奈冠裳羈叔夜不緣消渴阻相如
高情陳榻今應下三五休懸待望舒

贈陳太僕北上

兩朝執法太微臣繡斧雲霄早致身嶺險昔年殲虎豹

閣開他日畫麒麟驅車曉帶金陵月到闕長依玉座春
調鼎宅揆真有待須知崧嶽為生申

周王此日思周道伯冏還應作僕臣豈為渥洼龍驥好
欲令雲錦渭河新長城鐵騎時尋窟西域金牌舊入秦
八駿久間天廐滿燕臺馬骨更何人

星軺北上天顏近却憶披裘伏闕時萬里獨憐明主惠
三湘誰為賈生悲灌園講罷還溪澗鳴玉朝回祇夢思
幽側儻承閒燕問迂疎早已鹿門期

打魚

榜人齊擊雪花明
春水青蕪白浪生
撇去湖心金鎖直
到來几上玉梭橫
平摧雨鬣霑霑濕
細切霜鱗冉冉輕
下筯當筵應甚美
獨憐殘潰重傷情

滕州清明

十年松柏違親壠
此日清明又客途
滿眼郊原傾綠蟻
側身天地愧慈烏
蓼莪篇廢愁仍在
林木風來靜自呼
隔岸哀猿更嗚咽
一聲腸斷粵山孤

第一樓秋興

即郡城鐘樓也
少年讀書於此

萬石樓高切太虛家貧還得此樓居青山入戶寒偏瘦
綠鬢逢秋晚漸疎北郭長楸朝騁馬西隣明月夜吹竽
成都揚子惟清淨門外無人只著書

秦軍漢將昔臨關曾閃旌旗五嶺間南帝殿庭隨桂水
左丞墳墓滿楓山潮聲實見迎秋早棧道虛疑出塞難
萬古聖朝形勝地海濱真有虎龍蟠

羅浮山下古循州萬里風塵客倦遊北望九連關塞險

西聞三峽甲兵愁霜高越徼凋軍寨月滿禎城照戍樓
烽火海豐猶未息江湖空抱杞人憂

書懷

燕雲南望故山迷客子思家問路谿關塞緒寒春悄悄
鄉園歸夢草萋萋黃金臺沒薜蘿蕪合碧玉樓高日月齊
欲訪江門知不遠扁舟橫過鐵橋西

南望

南望遙天隔翠微東征消息願多違憂時藜藿空悲壯

故國蓬蒿有是非
莫雨幾年啼野鬼
春農何日返山扉
錦衣最恨愈樞府
數萬貔貅一夜歸

梧桐山

梧桐山上梧桐月
照見當年漢將營
旬日黃衣秋可掃
中宵白羽早還兵
波添淮水千家淚
驛奏燕雲足馬程
南北迢迢無限恨
村村烟雨髑髏聲

留別二陳明府

西來溫水二君稀
城北城南自掩扉
三徑雲深高士別

萬山天迴遠帆歸
尊移樹影離筵晚
路遶秋聲去馬遲
兩粵古今元接壤
并州回首共依依

陸川縣齋對雨呈張明府

晚風吹雨送新涼
遠樹依微近女牆
雲起戍樓秋黯黯
山圍官舍日蒼蒼
空庭鳥字來人少
清簟螺杯引興長
十載倦遊君獨惜
刺桐花下共徜徉

陸川縣譙樓晚眺呈張明府

雨過峰巒生夕烟
登樓秋色正堪憐
幾家城郭蒼山裏

一縣絃歌落照邊
花近烽狼消古戍
葉飛雲鴈下平田
開樽取醉勞明府
無奈中原別緒牽

向晚登樓望欲迷
清秋草色轉萋萋
蒼梧西上龍濠迴
翠嶺南來雉堞齊
千頃水田經雨濕
二更山月傍人低
未論鷄犬孤城寂
遶樹霜烏不夜啼

中秋飲姚氏園亭

名園佳節到柴扃
詞客開筵集草亭
碧海月從今夕好
清秋人似舊年經
病逢金谷還杯斝
夜轉銀河落戶庭

何事羽衣蟾闕上桂團風露正泠泠

龍山為交埤鄭君賦

交埤疊嶂來天地蜿蜒龍蟠鄭谷隅石竇雲生時作雨
海門月出夜明珠風搖老檜蒼鱗動日照平田錦翼敷
高帽山人兩蓬鬢重陽懷古幾踟蹰

壽李長史

董相還家綠滿園何如白首向王門下帷自草春秋傳
入室時窺道德言戰勝西湖鴉作鬢壽稱北海蟻盈尊

青牛紫氣從來盛
況復翩翩李耳孫

題節孝卷

穴中不共紅顏老
堂北無如白髮何
孤燕春來前縷在
雙魚朝進玉盤多
沂流舍側泉還湧
化石江邊水自波
彤管青編非忝竊
霍山南海鬱嵯峨

惠安有三岐麥六岐稷士民賦詩贈奉答

幾回春雨祝年豐
共說三岐隴麥同
千載慚吾非漢吏
七閩斯地有唐風
人家廢井黃巾後
海岸飛沙白葦中

擊壤自須歌帝力滿車誰敢竊天功

敢擬河陽麥兩岐東郊嘉稷轉堪疑干戈闕海初寧日
水旱東南灑淚時詞客有情歌盛美長安無計起瘡痍
年來疾病思田里慚媿河間稼獵詩

題觀羅臺

為愛羅浮四百峯築臺江上看芙蓉青苔坐掃蛟龍動
白髮遊憐鶴鹿從雲起錦屏開絕壁雨晴素練掛疎松
問余石洞幽棲處東望巔岼第幾重

奉送嶺西王公叅政湖南

攀車夾道走羣黎攬轡重清粵嶺西虎踞深山藜不採
雉飛平野麥初齊藩分江漢雄三楚笛奏烟雲散五溪
南顧即今紆聖主禁城春早聽霜蹄

右丞詩畫右軍書家學中朝盡不如彩服入門椿偃蹇
紫微分省樹扶疎武昌月朗延叅佐雲夢天寒賦子虛
為政風流誰得似洞庭清映使君車

蒲柳空嗟犬馬年祇應松柏晚猶妍

余齒同公余則衰矣公猶然壯夫也

漫勞一郡推麟筆，豈有三長過馬遷。

郡乘之役實公所推轂云

藻井

夜登穿海月，桂林秋泛澹江烟。
論文後會知何地，遙望清光北斗邊。

送丘南安還海康

風塵先我解牛刀，萬里冥鴻一羽毛。
誰信五溪多瘴癘，古來三峽壯波濤。
中原北望浮雲盡，函谷西還紫氣高。
春雨海門尋舊隱，折腰應嘯尚兒曹。

題江秀才蓮花草廬

巖城東下敞書臺重鎮身曾闢草萊倚杖潮聲三島接
捲簾山色五公來青雲高並芙蓉濕落日遙從睥睨迴
四壁蕭條君自愛漢王元羨長卿才

漫題柬徐弼卿張仲矩二國子陳巽卿洪子崇
江惟城三茂才

聞道中山有篋書太行風雨復何如青春愧我鳴琴後
明月投人按劍餘日落陰崖窺罔兩時危滄海滿樵漁
凌雲彩筆誰無羨早晚君王問子虛

詹侍御遊匡廬折肱不果詩以訊之

聞君名籍繫滄洲杖策尋僊不可留
九派春愁連楚澤五峯清夢滿江州
題詩忽動烟霞色伏枕俄驚日月流
望氣自憐關令尹何時函谷度青牛

飲洪子崇宅率爾賦贈

高堂華燭坐更闌節序逢秋暑欲殘
已見洪厓多道氣更憐葉縣有神丹
金銀宮闕三山迴名利風塵兩鬢斑
搔首望君霄漢上鐵橋夜夜夢中還

秋登大武山

大武高盤海上浮，登臨涼氣滿潯州。
乘槎漫憶三秋客，濯足遙從萬里流。
地拆南溟稀過鴈，天迴絕壁倚牽牛。
潮聲夜落雲霞淨，縹緲猶疑到十洲。

海上芙蓉萬仞開，翠含飛閣亦奇哉。
簷前日抱扶桑上，樹杪風吹碣石來。
哀壑暮雲看倚劍，高秋落葉伴登臺。
東南天柱雄今古，安得樓船下瀨才。

清海臺送陳山人入京得山字

舊遊詞客又燕關歲莫逢君一解顏把酒高臺縣落日
題詩寒色滿蒼山黃金宮闕行看近白髮風塵且未還
天上故人如見問將攜妻子鹿門間

晚發臨清

風起蒹葭船自開樹杪孤城返照來倒影樓臺虛徑度
鳴鑼舟楫晚須催鷗鳬鼓柁還汀芷河嶽流雲落酒杯
顧眄未論扶藥餌古今踪迹本蒿萊

茆屋落成訓韓甥寅仲

大成廟西蘇祠東我有一宅生蒿蓬茅茨過雨春不惡
火樹倚檻秋能紅開徑只合來二仲灌園豈為辭三公
館甥堂竹涓涓淨坦腹賦詩霜葉中

寄和太保兄弟紫燕

汝家兄弟迴無倫毛骨森森似鳳羣紫燕詩成還寄我

黃龍洞口更思君

時廬墓
黃龍

巢當畫棟逢秋色日向青天

帶暮雲海北海南惟有路莫將幽思問鴻鈞

贈真空上人

袈裟共泛真何意苦行空門似汝賢
薊北傳燈冰雪裏
嶺南持鉢瘴雲邊
淵明酒伴惟須菊
慧遠禪心只種蓮
今古茫茫不勝思
江干無語草芊芊

七言絕句

題畫贈方伯滕公

微垣花隱刺桐深
公暇時為抱膝吟
一曲瑤琴春萬里

不知棠樹舊成陰

題嘉樹
長吟

粵臺雲氣鬱蒼蒼
人在華胥白日長
不獨南牕堪寄傲

曲肱隨處是羲皇

題紫雲
高卧

鄭生學醫從海上軍索贈賦此

為問安期棗有無
片帆南海靜天吳
酬恩到處逢知己
夜夜雙龍匣裏呼

送張伯珍赴京

賈勇休誇六郡雄
提戈東望綠林空
可憐諸將封侯盡
白馬青袍向北風

百戰曾經七尺軀
先登親奪綉蝥弧
知君不用尚書貴

夜夜青天泣灌夫

答呂文在

雨送飛觴待兩姬
巴歌新製竹枝詞
天風吹落霓裳曲
夢裏相逢怨別離

贈玉娥

涉澗登臺鬢半鬆
玉娥相對玉娥峯
千杯勸盡不知醉
手挹飛泉入酒鍾

泉聲號號石鄰鄰
羅襪凌波不動塵
借問仙家誰得似

黍珠宮裏鮑夫人

千峰斜日一枰殘
月上霓裳駕鶴還
爾自姓王人不識
他年應比爛柯山

代玉娥會

妾本巫山山下女
朝朝暮暮在陽臺
可憐遺履軒前月
長照飛鳧海上來

飛泉直下幾千尋
洒落雲山紫翠深
採得山花羞妾面
汲將泉水比儂心

醉歸忘却玉搔頭
藤蔓牽衣碧澗流
流到門前尚嗚咽
松風蘿月兩悠悠

賦得海不揚波贈張將軍

大舶乘風馬不如
孤城落日莽蕭疎
即今空水天連碧
買酒將船問白榆

積水澄波靜不流
兩星相對鏡中浮
靈槎歲歲天邊下
共指尋源博望侯

大星小星墜海中
海鯨東去水涵空
樓頭戍卒渾無事

到處投竿學釣翁

將軍白馬紫虬髯
海上青山萬點尖
夜半高堂罷歌舞
高高山月照疎簾

送潘去華侍御還朝去華在粵著書名百六書
成而召故次首及之

南遷客舍寄枕櫛
五嶺今傳五月霜
自是主恩深雨露
肯令韓愈到潮陽

獨樹空庭對著書
書成馳傳起相如
名山石室非無地

紫氣紅光看斗墟

蒲葉青青榴子紅
還朝人識五花驄
遙知宣室將前席
一一風謡達九重

獨抱瑤琴久不彈
為君一曲再三嘆
從天玄鶴兼雲下
便欲因之寄羽翰

與梁思立譚永明飲韋純顯宅

庭月嬋娟出海樓
庭前貰酒鷗鷺裘
相逢那得還辭醉
二十論交今白頭

酒人燕市共譚生
偕計梁韋弟與兄
命駕豈難千里至
今人徒見古人情

海上高懸碣石宮
談天稷下競稱雄
君看莫逆者四子
滿目青山一笑中

太和道士李理雄
余字之守雌
丐詩贈以絕句
蚤向名山學
息機焚香長掩白雲扉
雄心一片降應盡
肯逐楊花作雪飛

太和道士王思明
從登紫霄峰
問其泉對曰上

善即老子若水者也字之子靜號以若水丐
詩贈之

一蒲青草自年年萬疊蒼山對夕烟靜後觀心如止水
高高明月在中天

白雲山樓中

高山心自下塵寰復有南樓在此間間坐樓中門盡闢
白雲朝去暮來還

白雲朝去暮來還一去一來俱在山十載離家不知返

而今始覺淚痕斑

下山雲雨上山晴誰道山雲亦有情
却似道人心一片無來無去又無生

不攜尊酒上山來只酌龍泉水
一杯泉水自清人自酌不愁心地有塵埃

下山却是上山泉欲飲還須在水源
不信諸君泉上看千條萬派落前川

高坐樓中雲作衣夜來親見鄭安期
無情最是峰頭鶴

金野人公言
卷十八
不為遊人住少時

題石山船二首

石船高駕碧山頭似畏風波急暮流十二時中平地起
問君何處不堪愁

木蘭為檝桂為橈南接端明學士橋我自虛舟人不識
海門風雨日瀟瀟

七月晦日同諸子大雨遊三髻山鼓御風之章

千山雷雨震天門萬壑飛流萬馬奔莫道遊人魂欲斷

瑤琴石室倒瓊樽

秋衣重濕海天寒
秀色三峯雨裏看
却恨多情逢佚女
雙鬟猶自隔雲端

足下層崖萬仞懸
耳邊危石一藤牽
白雲冉冉如無地
宿雨濛濛只有天

贈羅浮吳道士

羽人絳節自雲中
四百峰頭訪葛洪
他年天柱如相見
玄鶴飄飄舞碧空

柯節婦詩

盤石空庭對不移始知青鏡妬蛾眉
子規枝上三更血好似閨中嚙指時

太守新題照畫桮霜風颯颯滿清漳
汝家正在羅溪上一水泐洄萬里長

贈汝誠應貢北上

南來梨嶺萬重山綠綺逢君一解顏
滿院梅花開不盡朔雲春樹又燕關

翠壁蒼雲錦綉開
夜涼蘿月滿松臺
思君不見梅溪上
惆悵天風萬里來

萬國儒紳肅鷺行
九天閭闔覲龍光
東連碣石懸鵲
南度秦淮有鳳凰

九衢車馬日駢駢
君去初充上國賓
紆紫昔無安世貴
草玄今有子雲貧

排雲曾奏萬言書
無奈天閭獨望予
漢室有人詢賈誼
幽蘭依舊結芳裾

同李宗陽泛西湖招姪男兆不至口占促之時

年十五

西湖之水多白蘋白蘋映水搖烏中山花水花兩燦爛
君若不來花笑人

答真空上人

佛氏生憎五蘊山須彌原只在人間我今出世君知否
九萬扶搖一日還

有中說有還歸有無裏談無又著無我把此言來印證

恰如明月照江湖

賞報有序

時署閩清諭將赴南宮至福州報遷賞而後
言余曰今赴南宮及第是望即及第不賞何
也將如羅文毅劾李賢謫泉州市舶提舉何
賞為署教諭遷左亦知縣不賞何也將如陶
靖節八十日歸何賞為他日即召不賞何也
拜御史將批鱗命之不保何賞為三更報者

出而復入曰聞公廉甚知無橐金請書數字
他日索於里長余曰豈有費里長葉知縣乎
賦詩謝汝口占一絕

家住青山學隱淪偶來相訪武夷君
鐵橋流水不歸去腸斷清猿和白雲

洛陽望三髻山

雲鎖三峰霽未開空餘三髻象三台
輿人遙望遙相語昨日親曾雲裏來

宏路道中

日入蟲鳴草露涼
海風吹月月蒼蒼
郵亭處處看相似
高隔松林十里長

峽江渡

峽江亭前秋葉多
峽江渡口足風波
知君急渡如江水
帆影先開奈爾何

題茶洋驛清風亭

隔樹蟬聲度翠屏
穿林澗水倚欄聽
行人一到揚鑣去

惟有清風戀竹亭

贈別韋純顯赴泰和

書劍同遊二十年
柳絲長綰萬條烟
天涯落魄愁分手
君向西江我在燕

潞渚帆開獨滯留
燕山塵滿黑貂裘
愁來已就禰生賦
為我先投鸚鵡洲

南遊同唱郢人歌
楚水閩山路幾何
欲向天涯寄楊柳
祇憐攀折已無多

三忠祠在上東門古道飛沙白日昏
唯有前朝松栢樹霜枝聊可贈王孫

朝斗壇步月

太乙宮前月滿時滄波萬頃碧琉璃
手持玉笛瑤壇上吹起凌空錫杖飛

用韻答林中洲見問

寒烟藹藹雨霏霏草綠江南春未歸
滿樹桃花君莫問道人今已學無為

獨坐爐薰對雨霏閒看川逝共雲歸主翁欲問惺還否
何處惺惺更問為


友人約赴佛會詩以答之

便隨大衆說西天莫以焚香種福田白鶴峯頭一長嘯
不知誰是野狐禪

十四歲讀書永福寺友人伐鼓七聲命詩索道士酒

遠公昔日東林寺有酒曾呼靖節來今夜虎溪須盡醉

莫教明月照空杯



石洞集卷十八